

Warga SG masih anggap identiti kaum, nasional penting

NORHAIZA HASHIM

Berita Harian, 9th November 2017

MENGEKALKAN identiti bangsa seperti Cina, Melayu dan India yang digunakan di Singapura tetap menjadi elemen penting sebagai jati diri yang mengaitkan mereka sebagai rakyat Singapura, menurut satu kajian baru-baru ini.

Di kalangan orang Melayu yang ditinjau, sebanyak 51.7 peratus beranggapan kedua-dua identiti sebagai seorang bangsa Melayu dan rakyat Singapura adalah penting, menurut dapatan tinjauan Institut Pengajian Dasar (IPS) dan Channel NewsAsia (CNA) mengenai Identiti Etnik di Singapura.

Peratusan bagi Cina pula adalah 46 peratus dan India 53.3 peratus.

"Identiti sebagai rakyat Singapura dan etnik masih mendapat peruntukan tinggi di kalangan responden (sebanyak 49 peratus), berbeza daripada pandangan sebahagian orang bahawa identiti etnik dan kesingapuraan bercanggah," kata Dr Mathew Mathews, zamil penyelidikan kanan IPS, yang menerajui tinjauan itu dalam sidang akhbar semalam.

Seramai 2,020 responden terlibat dalam tinjauan itu yang mengenal pasti petanda utama bagi kumpulan etnik utama di negara ini, prestasi budaya etnik di kalangan rakyat Singapura, perkara yang mereka percaya harus disampaikan kepada anak mereka, dan sejauh mana pemahaman dan penglibatan mereka dengan budaya etnik lain.

Dalam pada itu, dapatan tinjauan itu juga menunjukkan lebih 90 peratus rakyat Singapura juga lebih cenderung menerima warga baru jika mereka mempunyai latar belakang Cina, Melayu atau India dan 84 peratus lebih cenderung menerima warga baru berketurunan Serani berbanding jika mereka berketurunan lain seperti dari Korea, Afrika atau Arab.

"Ini menggambarkan pentingnya model Cina, Melayu, India dan lain-lain (CMIO) dalam mengesahkan definisi sebagai rakyat Singapura," ujarinya.

Dr Mathews menerangkan sistem mengkategorikan seorang itu berdasarkan CMIO masih penting walaupun di kalangan golongan milenial.

Di kalangan milenial, terutama etnik minoriti seperti Melayu dan India berusia 21 hingga 25 tahun, identiti etnik seperti bahasa, warisan dan perayaan amat penting dalam identiti mereka.

"Ini menunjukkan etnik masih penting bagi kebanyakan rakyat Singapura," kata Dr Mathews.

Satu kelebihan meneruskan sistem CMIO adalah agar 'minoriti akan dapat terus mengamalkan budaya mereka dan merasakan diri mereka rakyat Singapura seperti majoriti etnik di sini, jelasnya.

Ditanya jika dasar berdasarkan etnik GRC dan Pilihan Raya Presiden (PE) yang dikhaskan bagi etnik tertentu masih diperlukan, Dr Mathews berkata Singapura memerlukan dasar bagi memastikan "setiap bangsa di Singapura tidak merasakan mereka perlu meninggalkan budaya dan bahasa mereka bagi apa yang mereka rasa amat bernilai".